



19229 Charpentier, Pierre. Lettre adressée à Fr. Portes par laquelle il mon-  
stre que les persecutions des eglises de France sont advenues, non  
par la faute de ceux qui faisoient profession de la religion, mais de  
ceux qui nourrissoient les factions et conspirations, qu'on appelle la  
cause. S. l. 1572. 36 ff. Vél.

Haag III, 347-48 I: „La plus révoltante de toutes les justi-  
fications de la Saint-Barthélemy“.

M. Pf.

*Rosenthal*  
*Munich*

60 —



9  
LETTRE DE PIERRE  
Charpéntier Jurisconsulte, adressée à  
François Portes Candiois, par laquelle  
il monstre que les persecutiōs des E-  
glises de France sont aduenues, non  
par la faulte de ceux qui faisoient  
profession de la Religion, mais  
de ceux qui nourrissoient les  
factiōs & conspirations,  
qu'on appelle la

CAUSE.



399

Case

F

39

.326

1572c2

THE NEWBERRY  
LIBRARY

LETTRE DE PIERRE CHAR-  
pentier Iurifconsulte, adressée à  
François Portes Candioys.

de

14.<sup>e</sup> piece

Ostre proces de saint Ger-  
main demeure enseuely par  
la mort soudaine de Seuc  
qui faisoit voz affaires en  
mon absence, & moy mesmes  
qui vous ecris la presente suis mort, estant  
pour la quatriesme fois en exil de France  
en Allemagne. Car en noz liures l'exil est  
vn espece de mort. Mais ie crains bien  
fort Portes mon amy, que les nations e-  
strangeres excitées par l'auctorité des an-  
ciens Philosophes qui estimoiēt indignes  
de pitié ceux qui enduret les peines qu'ils  
ont meritées, ne nous chassent hors de  
leurs limites comme infames & detesta-  
bles, soudain qu'ilz entendront que non  
pour la religion, comme auparauant, mais  
pour la Cause nous auons este chassiez  
hors de noz pays. Or afin que ie me puisse  
purger de ceste Cause, tant enuers vous  
qu'enuers tous les hommes de bien d'Al-  
lemagne & de Souysse, le vous ay bien

301  
voulu aduertir par la presente escripte  
grosierement & d'un nouveau style, que  
ie ne me suis iamais meslé de ceste Cause  
mais au contraire, cōme ayant esté la four  
ce de tous noz maux, ie ne m'y suis iamais  
enrollé, & l'ay tousiours eu en horreur cō  
me vne dangereuse peste. Car que pēult  
auoir eu de cōmun ceste Cause (qui n'est  
autre chose qu'une illicite assemblée & fa  
ction de quelques vns des nostres qui ne  
ont voulu vser de la paix & viure paisible  
ment, pour interrompre le repos public,  
entraindre & violer les ordonnances de  
nostre prince) avec ma nature paisible, &  
ma profession de Iurispudence, qui ne  
consiste qu'en l'observation & reuerence  
des Loix, & qui punit tresgriueusement les  
seditieux, & tous ceux qui les mesprisent?  
Ie m'estois fort resiouy, & embrassois la  
liberté qui nous auoit esté baillée par no  
stre Roy Charles comme vn don de Dieu  
si long temps & si fort désiré par nōz pre  
decesseurs. Mais soudain que i'ay cogneu  
que ceste damnable Cause ne tendoit au  
seruice de Dieu, mais au contraire à vne  
meschante & seditieuse rebellion, ie m'en  
suis du tout retiré, & n'y ay iamais adheré,

voyant qu'elle destournoit les cœurs de la foy & obeissance que nous deuôs tous à nostre Roy, de laquelle nul vray François ne se peult destourner sans la perte de son ame. J'ay pensé que nostre Roy Charles estoit enuoyé du Ciel pour esteindre ces feux qui nous consumoient du temps de François & Henry ses pere & ayeul. Je me suis contenté de ce qu'il m'estoit permis de viure en paix & tranquillité souz sa protection. Mais quant à ces fauteurs de la Cause, qui tendoient à autre chose qu'à l'establissement de la Religion, & s'estudioient à nouveautez, ie leur ay souuentesfois predict les calamitez & tempestes dont nous sommes maintenāt opprimez avec eux. Ce que ceux qui restent des affectionnez à ladicte Cause, ne me scauroient nier. Or nous sommes tous perduz: si vous m'en demandez particulierement l'occasion, ie ne vous la puis dire, seulement vous puis dire que nous sommes perduz, & du tout perduz, si Dieu ne nous ayde. Mais vn seul poinct me tourmente fort, c'est que nous endurons pour les fautes d'autrui, & sommes fort marris que nous, qui ne nous addon-



401  
nons à autre, qu'au repos & à la pieté,  
ayōs souffert naufrage avec les seditieux  
avec lesquels nous ne nous estions ja-  
mais meslez, mais au contraire nous en e-  
stions du tout separez de faict & de vo-  
lonté. Ce que vous pourrez mieux con-  
gnoistre par la marque qui nous distin-  
guoit d'auec eux. Car les nostres estoient  
doux & pacifiques, contens de leur pre-  
sente fortune, & de la clemence de leur  
Prince. Eux au contraire, turbulents, esle-  
uez, & non contents de la liberté de con-  
science & exercice de religion qui leur  
estoit oſtroyé, ilz vouloient tout renuer-  
ser, se nourrissoient de sedition, & pre-  
noient l'incertain pour le certain.

Bref toutes les marques par lesquelles  
en l'escripture sainte on peult discerner  
les bons d'auec les mauuais, nous sépa-  
roient d'eux. Ilz faisoient assiduele-  
ment conuenticules & assemblées, là ne  
se parloit n'y de Dieu, n'y de Paix, n'y  
de tranquillité. Les propos qui sy te-  
noient n'estoient que de guerres & es-  
motions. En public ilz mettoient en a-  
uant le pretexte de la Religion, en se-  
cret ilz ne bastissoient rien que guerres

& diffentions. Et comme Minos & Lycurgue, ilz fondoient le principal appuy de leur Republique sur leurs armes. Ainsi toute l'esperance de leur Cause repositoit du tout sur leurs forces. Et non contents de la calamité des guerres passées, dont on voit encores la France toute ruinée, ilz vouloient (afin que i'vse des motz de Samuel) deuorer perpetuellement la France de leur glaive. Et toutesfois leur pretexte estoit, qu'ilz vouloient maintenir leurs Eglises en pleine liberté, laquelle ilz disoient n'auoir entierement par l'Edict de Pacification.

A ces peruerfes entreprinſes nous nous opposions virillement, car nous estions plusieurs de bon aduis qui estions adonnez tant seulement à la tranquillité & vraye pieté, & detestions les guerres, principalement Ciuilles, ausquelles (comme dict l'escripture sainte) l'amertume gist en la queue. Nous mettions en auant le repos & tranquillité, & detestions les armes. Estions d'auis de changer les lances en coultes, & les espées en besches. Nous disions qu'ilz n'estoient esmeuz d'aucun zele à maintenir



40  
la liberté Chrestienne, mais que soubz  
ce beau pretexte de liberté ilz vouloient  
couvrir leurs conspirations, & qu'il ad-  
viendroit, s'ilz ne se desistoient de leur  
entreprise, qu'ilz seroient en bref frap-  
pez de la main de Dieu, comme paroys  
blanchies, pource qu'il est escript d'eux,  
Ayans la liberté pour pretexte de malice.  
Car iamais en aucun siecle si entiere paix  
ne fut donnée aux Eglises, que celle qui  
nous a esté donnée en nostre temps, par  
la benignité du Roy Charles, de sorte  
que nous auons peu vrayement dire, ce  
que dict Nicephore de ceste grande paix  
des Eglises, qui fut renouuclée soubz  
l'Empire de Martian, qu'en nostre temps  
les siecles ont esté d'or.

Les Historiens nous tesmoignent que  
depuis Galien iusques à Diocletian, la  
paix a esté tresgrande aux Eglises.

Les principaux poinctz de telle felici-  
té ecclesiastique nous sont racomptez  
par Eusebe, en ce qu'il dict que les Em-  
pereurs donnoient aux Chrestiens les gou-  
uernemens & dominations sur les Gen-  
tilz, & par leurs Edictz leur octroyoient  
toute

toute liberté & seureté . Nous auons eu tout cela, & encores plus, ayans eu le Roy si debonnaire, que les Papistes nous portoyent enuie & se playgnoyent de ce que nous estions preferés à eux, disans qu'estans enfans de l'ancienne Religion, & fils aysnez de Prince, l'ancienne loy de Dieu ne permettoit qu'ils marchassent derriere les posthumes de la nouuelle religiõ, leurs prescheurs alloient publians de nous ce que le tribu de Iuda disoit des dix tribus, desquels il se plaignoit, de ce qu'ils luy auoient esté preferez par Daud, disant: *Ils ont desrobé le cœur du Roy*. Et à la verité ce bon Prince nous a esté si doux, qu'aucun ne sçauroit nier (sil n'est du tout empoisonné de ce noir venin de la cause) que ce Roy plain de toutes vertus ne nous ayt fauorisé iusques là, que d'auoir receu humaine-ment, & orné en ce qu'il à peu, ceux mesmes qu'il sçauoit faire tous les iours assemblées illicites au dommage de luy & de son Royaume, à fin de les gaigner par douceur & les destourner de leur miserable entreprinse, imitant en cest endroit Auguste, lequel ayant esté aduertiy que Cima neveu de Pompee luy dresloit em-

904  
busches, l'ayant faict venir à soy le traicta  
fort humainement, le fit seoir pres de soy,  
& luy offrit le Consulat pour luy amolir  
son courage, & le rendre sien, ce qu'il fit.  
Quant a nous congnoissans que toutes  
ces choses se faisoient si liberalement par  
le Roy, & au contraire que ceux de la Cau  
se demeuroient obstinez en leurs malheu  
reux propos, nous estions tous marris, &  
contrainctz de confesser avec les Papi  
stes, que le Roy, bien que d'ailleurs rem  
pli de toutes vertus, auoit le vice de The  
dore le Jeune, & Alexis Cómene Empe  
reurs, c'est à sçauoir la trop grande clemē  
ce, pour laquelle, comme nous tesmoi  
gne l'Escripture Saincte, Dieu à iadis chas  
sé les Roys de leurs Royaumes. Et com  
bien que le Roy retinst la religion de ses  
ayeulx neantmoins iamais il ne parla mal  
de la nostre, nommant nous, & ceulx de  
nostre religion de noms treshónestes tāt  
en public qu'en particulier, s'abstenānt, &  
commandant par ses edicts qu'o s'abstint  
de ces vilains noms que les Papistes sou  
loient nous dóner, d'heretiques, seditieux,  
& crimineux de leze Maiesté, ne permet  
tant en façon du monde que nous fus-

sions prouoquez de faict ny de parolles. Et pour le regard de nos ministres, il a renouuellé de nostre temps ce saint & celebre edict de Valentinian, qui deffendit à toutes personnes de n'irriter ny prouoquer les Ministres de l'Eglise, comme estâs laboureurs du champ de Iesus Christ & procureurs du grand Roy. Et en composant les edicts de paix, il commanda qu'on effaçast les parolles qui s'y trouueroient aigres, & qu'on y en mist au lieu de douces, & qui n'eussent aucune aigreur, afin qu'il ne seblast point qu'il voulüst marquer de parolles ceux qu'il ébrassoit cōme tres-fidelles subiects. Enquoy, comme en plusieurs autres choses il monstroït la douceur de son esprit, & combien il estoit éloigné du naturel des Princes, qui faisans bien aux personnes attachent leur honneur de parolles. Enquoy avec iuste cause est repris Nerua, lequel lors qu'il donna la paix aux eglises des Chrestiens, & qu'il fit eslargir leur prisonniers, il coucha son edit en ces termes, Qu'il vouloit q̄ tous les coupables d'impieté fussent absoulz, quoy disant il marquoit d'impieté les vrais culteurs de pieté. Bref, toutes & quantes fois



440  
que sa Maieſté s'eſt trouuée aux iugemēs  
des proces d'entre nous & les Papiſtes, el-  
le s'eſt rendue ſi fauorable enuers nous,  
que les Papiſtes en murmuroiēt bien fort,  
diſans que le Roy n'eſtoit gueres eſloi-  
gné de noſtre religion comme ancienne-  
ment pluſieurs ſoupçonnoient Alexander  
Seuerus d'eſtre Chreſtien ſouz om-  
bre qu'il fauoriſoit les Chreſtiens en ſes  
iugemēs. Mais le bō Prince encōres qu'il  
entendit bien que ſi vn peuple eſt mal e-  
diſié de la religion de ſon Prince, il ne luy  
obeit pas volontiers, d'autant qu'il tolere  
plus volontiers ſes mœurs corrópues que  
ſa doctrine peruertie, à l'exēple de l'Empe-  
reur de Conſtantinoble, qui abandonna  
BASILISCVS tenant la religiō peruerſe,  
pour prendre Zenō Prince de mauuaiſes  
mœurs, mais de religion bonne: Auffi qu'il  
auoit ouy dire que du tēps de Lotaire, le  
Roy de Bulgariē auoit eſté fort affligé &  
preſque depoſſedé de ſa couronne par les  
ſiens pour meſme cauſe, neantmoins en-  
cor qu'un tel danger ne fuſt à deſpriſer, il  
ne chāgea point pour cela de courage en-  
uers no<sup>s</sup>, & ne laiſſa de nous faire cognoi-  
ſtre en tout & par tout cōbiē il nous auoit

pour agreables, nous accordant toutes choses de fort bon cœur, & ne voulât en façõ du monde nous desplaire pour plaire aux Papistes, qui le pressoient fort, & les plainctes desquelz estoïent par luy sagemēt dissimulées, & virilement reprimées. Et quād les principaux des Papistes delibērās en son conseil priué de la tranquillité du Royaume luy mettoiēt en avant ceste sentence de Diocletian, que le Royaume ne pouuoit estre remis en son premier estat, si premier la varieté des religions, n'estoit ostée, & chacun contraint de retourner à son ancienne religion, & que s'il ensuyuoit l'ordre qui auoit esté tenu par son pere & ses predecesseurs, la chose publique seroit bien regie & conseruée, luy remonstrans que luy mesme deuoit mettre la main à chasser ceste nouuelle & estrangere religion, & en cela imiter Paul Æmil consul, lequel, quand le Senat fut d'auis qu'il falloit demolir les autels estrangers d'Isis & de Sirapa, ne se trouuant aucun manouurier qui y osast mettre la main, apres auoir despouillé sa robe, print vne hache, & en donna contre les portes de leur temple, disans que le Roy deuoit

faire le semblable, & alleguans plusieurs autres raisons pour l'exorter à ce, luy se monstrant ferme & constant pour l'observation de son edict de paix ne leur vouloit prester l'oreille, mais leur faisoit la mesme respóce que l'Empereur Michael fit iadis à Nicephore qui le vouloit aigrit par lettres contre ceux qui ne vouloient honorer les images, le ne contraincts personne à la religion. Semblablement aux moynes, Sorbonistes, & autres semblables, qui par harangues elaborees & vehementes l'auoient voulu enflamber contre nous, il leur fit vne responce semblable à celle que fit Iouinian l'empereur aux Macedoniens qui l'auoient voulu esmouoir par plusieurs calumnies contre les Catholiques, sçauoir est qu'il detestoit les contentions, & aymoit & honoroit ceux qui viuoient en bonne paix & cōcorde. Et tout ainsi q̄ le mesme Iouiniã íposa silence à Lucius prestre Alexãdrí qui par fréquētes lettres accusoit & calúnioit Athanase Euesque Catholique, semblablement nostre Roy supprima les escriptz diffamatoires de semblables gens qui ne tendoient qu'à troubler, & leur imposa silence. Bref



en routes choses sa clemence a esté telle enuers nous, que vrayment nous auons peu dire ce qu'anciennemēt on a dict de la grāde tranquillité des eglises du temps de Maurice. En l'eglise du Seigneur pieté & felicité marchoiēt ensemble. Car quād les anciens ont voulu dire aux plus mauuais temps que les eglises estoient affligees ils ont noté qu'il n'estoit point permis aux eglises de conuoquer presches & sinodes, comme au temps de Licinius. Au contraire quant ils ont voulu remarquer vne grande tranquillité aux eglises, ils ont dict qu'ils si faisoient plusieurs & frequents sinodes & assemblées. Nous auons eu toute liberté, seureté, & frequence de Sinodes, & telle que l'antiquité n'en à eu de plus grandes, ce que vous aussi Portes, auez assez congneu. Car ce bon pasteur qui adore la Candide, & pense qu'il ny ait autre Deité qu'elle, vint de voz quartiers pour assembler le Synode, & y presider au grand regret de tous les gens de bien. Il a contrainct le Parlement de publier les edicts de pacification pour vne plus grande seureté & liberté. Le Parlement se defendoit par l'auctorité des anciennes loix

413  
à l'exēple du Senat Romain, lequel quād  
il eut fait mourir Apollonius Chrestien  
contre les loix d'Antonius qui deffen-  
doient qu'aucun ne fust puny pour la re-  
ligion Chrestienne, s'excusa disant qu'il  
auoit des anciennes loix par lesquelles il  
n'estoit permis de laisser eschapper au-  
cun qui se cōfessast Chrestie. Mais nostre  
bō Roy ne reçeut ny approuua sēblables  
excuses, & ordōna que les nouuelles loix  
derogeroient aux premieres, & que selon  
elles les iugemens seroient dōnez. Et ayāt  
entendu que plusieurs prenoient en mau-  
uaise part ceste publication d'Edictz, di-  
sans de luy ce que iadis on disoit de Ma-  
ximinus qui commandoit de publier des  
edicts pour la liberté des Chrestiens, sça-  
uoir est que le Prince faisoit ses edicts par  
ignorance, nostre bon Roy esmeu de sem-  
blables propos pour monstrier qu'il ne les  
auoit point faicts ny par ignorance ny par  
surprinse, ains avec plaine cognoissance  
de cause à voulu souuentesfois assister à  
la publitation de ses edicts luy mesmes,  
& plusieurs fois à discouru fort diserte-  
ment sur les raisons qui l'auoient induit  
à faire son edict de pacificatiō. Entre tous  
les

les Edicts qui ont esté anciennemēt faicts en faueur des Chrestiens, celuy que Maximinus fit publier estant prest de mourir est principalement celebré, par lequel il ordonna que tous Chrestiens fussent remis sans rien payer, en tous leurs biens qui leur auoient esté occupez par le fisc, ou par les citez, ou qui auoient esté autrement donnez ou vendus à des particuliers, Par lequel edict Maximinus fauorisa aux Chrestiens au dommage du tiers acheteur ou possesseur, contre droit & iustice. Mais les Chrestiens n'ont senty aucune commodité de cest edict durant la vie de Maximinus ny apres sa mort. Mais nous auons receu grande commodité de ces edicts par la clemence de nostre Roy, qui n'a iamais cessé iusques a ce que la chose fust paracheuee, & que nousussions du tout remis en despouillant les possesseurs de bonne foy, sans qu'il nous coustast rien. D'auantage il se fioit beaucoup plus à ceux de nostre religion qui n'auoient iamais varié qu'à ceux qui auoient suiuy tantost l'vne part, tantost l'autre, iugeant ce prince tressage que ceux cy entretenoient en leur cœur vn mon-

ceau d'impietez recueillies de plusieurs  
 religions diuerſes. Ainſi ce bon prince les  
 meſpriſant taxoit couuertement leur in-  
 conſtance, à l'exemple de Leon Empe-  
 reur qui n'auoit voulu mettre l'Empire  
 entre les mains de Zenon, pource qu'il  
 auoit varié en la religion, mais auoit eſleu  
 pour ſon ſucceſſeur ſon fils, qui n'auoit  
 tōbé en ſemblable vice que le Pere. Cha-  
 cun ſçayt de quelle humanité & libera-  
 il à receu & traicté les Ambaſſadeurs des  
 Princes Allemans de noſtre religion, qui  
 parloient pour noſtre liberté, & eux meſ-  
 mes peuuent teſmoigner comme ilz fu-  
 rent renuoyez honnorablement avec pre-  
 ſens & impetration de ce qu'ils deman-  
 doient, Il leur promit de nous donner  
 tout exercice & ſeureté de noſtre religi-  
 on, il n'a point mis cela en longueur, il  
 n'a point adiouxte de condition. Ce bon  
 & liberal Prince n'a point voulu imiter  
 hunnericus hundrius Roy des Vaudales,  
 & des Alains, auquel quand l'Empereur  
 Zenon eut demandé par ſes ambaſſa-  
 deurs la paix pour les eglises Chreſtien-  
 nes, & ſpeciallement pour celle de Car-  
 thage, il otroya vrayement l'exercice



de religion à tous les Chrestiens qu'il auoit en sa subiection, mais à telle condition que ceux de sa secte auroient semblablement exercice de la leur dans Constantinoble & par tout l'Orient. Mais ce Prince liberal n'a point voulu vser de ces reciproques demandes, non du tout iniques & hors de raison enuers les Princes d'Allemagne, & la Roynes d'Angleterre, Car il nous à donné entiere liberte à leur requeste sans exceptions ny conditions quelconques.

Et ne s'est point courroucé contre les nostres de ce qu'ilz sollicitoyent les Princes estrangers à parler pour eux.

Car ceux qui demandent par autruy ce qu'ils deuroient demander eux mesmes semblent se defier de la clemence de leur Prince, & telles choses ont accoustumé d'engendrer grandes desiances en l'endroit des Princes soupçonneux. Mais nostre Prince tresdebonnaire ne s'est point offencé de telles choses que les autres ont accoustumé de punir en leurs subiects.

917  
Car il est deffendu au subiect de negotier  
avec l'estranger sans le cōgé de son prince.  
Et a ceste cause on dit que Theodorus E-  
uesque d'Antioche fust iustement enuoyé  
en exil, pource qu'en cachette & au des-  
ceu du Prince d'Arabie son seigneur, il a-  
uoit escript vne lettre à Cōstantinus, Aus-  
si Sapor Roy de Perse chassa Simeon E-  
uesque, pource qu'il estoit trop familier  
de l'empereur de Rome. Mais nostre Prin-  
ce n'a tenu compte de ces choses, ne vou-  
lant à l'exemple d'Agésilas estre iuste, &  
vser de son droit à l'écontre de nous qu'il  
aymoit. Il s'estudioit du tout à conseruer  
la paix entre nous & les Papistes, & si gou-  
vernoit en telle maniere, & tenoit vn tel  
moyen que le cours des deux religions e-  
stoit fort tranquille en son Royaume, &  
par sa grande prudence & vigilance nous  
rendoit facile vne chose qui sembloit du  
tout impossible. Il fut publié vn edict du  
temps de Rotaire Roy des Lombards, que  
par tous les lieux d'Italie il y auroit deux  
eglises & deux Euesques, l'vn Catholi-  
que, l'autre Arrien: tant qu'il pleust à Ro-  
taire, la paix dura en Italie entre les deux  
eglises, mais lors qu'il eut changé d'opini-

on & qu'il ne se soucia plus d'interposer son autorité à la conseruation de ceste tranquillité, la paix fut soudain rompue entre les deux eglises. Mais nostre paix a esté interrompue, non par la faute du Roy, mais par nostre propre vice, & par nos factions, Car nostre Roy est tousiours demeuré en mesme volonté de garder son Edict, & par luy il nous estoit loysible de viure en repos & tranquillité. Sçachez donc en brief par quelz moyens & par quelles factions, & machinations des meschans hommes nous sommes decheuz d'un si grand repos & tranquillité ou nous estions. Enquoy à fin que les meschans qui sont à l'entour de vous ne disent que ie controuue aucune chose, i'appelle Dieu à tesmoing que tout ce que ie diray ne fera ny en faueur de nostre Roy, ny en hayne ny charge d'aucun. Ceux qui m'ont congneu de longue main sçauent combien ie suis ennemy de mensonge & de vanité, Car ie sçay que les Theologiens attribuent le mensonge aux Diables, & les Philosophes le nombrent entre les choses deshonnestes.



Sainct Augustin voulant monſtrer que toutes les perſecutions de l'eglise eſtoient nées des ſeditions & des factions que les Iuiſs fabriquoient en leurs Synagogues, a appellé le Synagogue des Iuiſs la ſentine de perſecution. Ainſi nous pouons appeller ceſte meſchante & malheureuſe Cauſe, qui eſt le ſeul motif de noſtre ruine, nous le pouons à bon droit nommer la fontaine & ſource de toutes nos perſequitioons. L'inquietude, l'inſolence, & la conſpiration des noſtres qui ſ'efforçoient d'auancer ceſte Cauſe par damnableſ moyens nous a priuez de noſtre liberté Chreſtienne, de nos patries & de nos biens. Ainſi nous innocens eſtans meſlez en ce tumulte avec les meſchans & ſeditieux ſommes punis & auons ſouſtenu le courroux de noſtre Prince. Ainſi anciennement les Iuiſs par leur eſprit turbulent irriterent les courages des princes payens contre eux & les Chreſtiens enſemble, de forte que par la faute deux ſeulement les vns & les autres furent chaffeſ, comme les hiſtoires le teſmoignent, du temps de

Claudius.

Semblablement du temps de Traian pour la sedition des Iuifs les Chrestiens encores qu'ils fussent innocens furent quant & quant chassez par l'ordonnance du Senat, comme ennemys de la republique. Lesquelz Iuifs estans rebelles & seditieux de nature, ne pouuans exciter les Chrestiens à estre rebelles à leurs Princes les pourfuyuoient comme ennemys mortelz, comme tesmoigne Iustin en son colloque avec Tiphon, iusque là, qu'au temps d'Adrian BAROCHABAS, Chef de la faction Iudaïque ne pouuant exciter les Chrestiens (qui n'estimoient estre permis de s'opposer à leurs superieurs) à s'armer contre le peuple Romain enuahit les Chrestiens mesmes & exercea vne esmerueillable cruauté contre eux.

Ainsi ces sectateurs de la Cause desirans defendre leur Cause mal instituée par nostre sang, se sont en vain efforcez de nous faire prendre les armes, & nous rendre coupables de leurs maudittes conspirations, dont ils ont

irritez griefuement, ceux qu'ils ne pou-  
uoient bleſſer avec le fer eſtoient par eux  
outragez d'iniurieſes parolles, de ſorte  
que nous qu'ils auoyent prins en hayne  
plus que les Papistes, meſmes eſtions deſ-  
chirez par eux de toutes ſortes d'iniures &  
medifances, & pour n'auoir voulu eſtre  
complices de leur malheuretez nous e-  
ſtions ſeparez d'avec eux. Nous donc à  
l'exemple des Lacedemoniens, eſtimions  
qu'il falloit ſacrifier aux Muſes & non à  
Mars, c'eſt à dire qu'il falloit chercher tous  
moyens honneſtes de reconcilier avec  
nous les Papistes nos aduerſaires avec  
tous bons offices, ſans les prouoquer d'a-  
uantage par iniures, ny par armes à l'en-  
contre de nous. Eux au contraire diſoient  
qu'il falloit pouſuyre hoſtillement les  
Papistes par toutes voyes, ſoit par armes  
ou par parolles, & qu'il falloit laſcher la  
bride à la fureur. Ils auoient tousiours en  
la bouche la trôpette du ſeditieux GEBE,  
par laquelle il excitoit le peuple à ſedi-  
tion & rebellion contre le Roy David.

Ils diſoient auſſi que la paix & vnion  
ne ſe pouuoit religieufement ny Chre-  
ſtiennement

stiennement entretenir entre les Papistes, & nous, & qu'il se falloit garder par tous moyens que cela n'aduint comme estant chose pernicieuse à la Cause. Et pour le mieux persuader ilz alleguoient plusieurs raisons prises de l'autorité de ie ne sçay quelle nouvelle Theologie tirée de ce vilain lac, duquel on a tiré comme d'une mine & carriere toutes les seditions & conspirations. Ilz n'auoient faulte de Ministres apostez, lesquelz instruietz en la mesme escolle de meschanceté, excitoient les cœurs des plus paisibles à sedition, & par leur furieux presches destournoient plusieurs gens paisibles de leur bõne nature. On dict que Xenocrates a tellement touché le cœur de ses auditeurs, que plusieurs apres l'auoir ouy, de dissoluz deuenoient temperans & modestes. Mais des presches de ces furies aucun n'est reuiert plus modeste, aucun n'en deuiert meilleur, au contraire de paisibles & modestes qu'ilz estoient, ilz s'allument tellement de ceste fureur, qu'ilz deuiennent prompts & hardis à commettre toute sorte de meschanceté. Autre fois Pierre Ramus homme de bien, & fort eslongné de



225  
la Cause, & moy, nous sommes trouuez  
au presche d'un de ces Ministres qui des-  
gorgeoit plusieurs iniures contre les Pa-  
pistes, & excitoit les siens à sedition, nous  
fumes contrainctz de sortir avec vn fort  
grand creuecueur, & non sans murmurer  
cōtre luy. Dequoy ce bon homme se sen-  
tant offensé, nous en vint demander la  
raison, apres auoir acheué son presche.

Nous luy fismes ceste responce, En l'hi-  
stoire ecclesiastique Valentinian lieutenant  
de Iulian, qui depuis fut Empereur, a esté  
fort loué de ce que faisant compagnie à  
Iulian allant au temple, de fortune il bail-  
la vn coup de poing au portier du temple,  
pource qu'à l'entrée il luy auoit iecté vne  
seule goutte de leur eau de purgation, sur  
son vestement, d'autant qu'il disoit que  
luy qui estoit Chrestien ne se sentoit point  
purgé de ceste eau Ethnique, mais plust-  
tost souillé. Aussi si nous t'eussions donné  
des coups de poing à toy qui as souillé &  
offensé noz oreilles, en espendant le ve-  
nin de ta seditieuse Cause, vn chacun  
pourroit dire que nous aurions faict cho-  
se digne de toy & de ta fureur. Ainsi nous  
se laissasmes, apres l'auoir griefuement

rancé. Les Ministres n'oubloient rien à faire pour exciter les gens à sedition, & rompre la paix publique.

Au contraire nous auions plusieurs de noz Ministres gens de bien, sçauans, & craignans Dieu, & detestans la Cause, lesquelz nous opposions comme vne muraille à leur entreprise. Sçauoir est d'Espina, des Rosiers, Albrac, Capel, de la Haye, Mercure, & plusieurs autres, lesquelz vostre souuerain Pontife (qui par la lecture des Poetes lascifs & de Rabelays, tant aduancé en impieté & impudence, qu'il ne peult gouster aucunement la pieté) hayssoit & detestoit, & les auoit notez de sa censure comme desertours de la Cause. Car il a ordonné par ses decrets que quiconques ne se lieroit avec serment à la Cause seroit excommunié.

Mais nous qui mesprisions ses censures mettrions peine, à ce que ce mal public de la Cause n'augmentast, & ne prinst racine. Et quant à moy qui estois fort occupé à mon office d'Aduocat, i'employois tout le loisir que ie pouuois prendre à combattre ceste furie.

727  
Or la principale raison qui m'induisoit à detester & opprimer ceste Cause, estoit que ie voyois que ceux qui sy estoient vne fois liez estoient si changez que personne n'eust iugé que iamais ilz eussent esté François. Car ilz commençoient incontinent à parler si mal du Roy & des Princes de France, & monstroient en auoir si mauuaise opinion, & hayssioient de telle sorte la race de Valloys, qu'ilz auoiét horreur de l'ouyr seulement nommer. Dont voyant vne si grande mutation, & si eslongnée des cœurs & mœurs des François, ie me suis doubté que les Sacrificateurs de ceste malheureuse Cause ne receuoient personne en leur roolle, que premier ilz ne luy eussent arraché le cœur, dans lequel chacun François a la fleur de lys, & l'amitié de son Roy visuellement enracinée, Imités en cela Nahas qui ne voulut onc recevoir les Iubiens, sinon que souz condition qu'on leur arrachast l'œil dextre. Et certainement, afin que nous mettions à part toutes fictions, depuis que quelques vns estoient enrollez en la Cause, comme s'ilz eussent perdu l'œil dextre, ilz regardoient de trauers de leur œil gau-



che, & enuieux heur de nostre Roy, & la  
 prosperité de iō Royaume. Et estoit ceste  
 hayne & ce venin infus & distilé dans le  
 cœur de noz François, principalemēt par  
 ce meschant qui preside sur vous, & qui,  
 comme s'il estoit de la nation Assōmonée,  
 obtient le Royaume & Pontificat : lequel  
 voyant que la France, qu'il vouloit met-  
 tre à feu & à sâg, est eschapée vne & deux  
 fois de son gosier, s'est tellement enflam-  
 mé contre nostre Royne (laquelle ayant  
 le gouuernement de son filz ieune auoit  
 rompu prudemment & virilemēt tous ses  
 desseings) qu'il ne tascbe maintenant que  
 d'abolir le nom de Valloys, & renuerser  
 l'estat de la France, disant publiquement  
 qu'il fault oster la mere & les petitz, afin  
 que i' vse de sa façon de parler. Il enseigne  
 cela publiquement tant de bouche que  
 par escript, & l'imprime dans le cœur & la  
 poitrine de tous ceux de la Cause. Voyla  
 le prinzipal but de la Cause auquel aspi-  
 rent & tendent tous les efforts de ceux  
 qui en sont. Ilz s'en promettent bonne  
 yssue par l'auctorité de leur abominable  
 Prophete, la voix duquel est à ces gens a-  
 ueuglez comme vn oracle, & les escrits

722  
comme les liures de la Sybille . Et pour mieux y exciter ceux de sa Cause, & attirer plus de gens à icelle , il fainct comme vn second Catilina que plusieurs grands seigneurs & gens de bien , qui neātmoins detestent leur sedition, sont occultement de la partie. En apres il donnoit faucemēt à entēdre qu'on auoit faiet des assemblées en Angleterre & Souyffe pour aduancer les affaires de la Cause, au preiudice du Roy & de ce Royaume . Et que tous auoient conspiré à ces fins, & auoient promis d'y employer leur peine, leur bien, & leur puissance, moyennant que ceux de la Cause de France eussent bon courage, & qu'ilz fussent bien deliberez de s'ellesuer promptement en armes . Il blasmoit incessamment la lascheté de ceux de la Cause, de ce que viuans en paix & tranquillité il sembloit qu'ilz eussent oublié l'inimitié qu'ilz portent au Roy & aux Papistes. Il disoit que s'ilz se hastoient la victoire estoit en leur main , au contraire que par trop longue attente les occasions se perdoient. Et faisoit scauoir tout ce que dessus au prince de la Cause, & à ses plus fidelles Conseillers, par lettres, escriptz,

marques, noms changez, & desguifez, afin de tenir couuertes les meschantes intentions à nous qu'il craignoit autant que les Papistes : d'autant qu'il ſçauoit que vacquans tant ſeulement à pieté & tranquillité nous le detestions avec ſes ruses. Mais ayās moy & quelques vns des nostres decouvert par bruietz, ſoupçons, & autres indices assez certains qu'il en vouloit à la personne du Roy, & taschoit de renuerſer ſon eſtat, nous luy eſcriuiſmes ſouuent au parauant ceſte derniere conſpiration pluſieurs lettres rudes & plaines de menaces par leſquelles nous luy denoncions nouuel œuure, & qu'il ſe departiſt de ceſt œuure ſeditieux & diabolique, & nous laiſſaſt iouir de la paix & repos, ſans ſe meſſer des affaires de France. Mais en fin nous n'auōs peu eſchapper que ce malheureux ennemy du Royaume & du repos public, avec ſa funeſte Cauſe, dont il a ietté les fondemens par l'induction de Sathan, ne nous ait faiet tomber en ces calamitez & amertumes.

Et ce pēdant ſans ſe mettre en dāger, loin de terre, il regarde Neptune faiſant rage,

4  
prenant son plaisir au milieu des bāquetz  
& tauernes, tandis que nous pleurons, &  
sommes en exil pour sa meschāceté. Lors  
qu'il oyoit dire que nous meniōs paisible  
vie, & qu'au Ciel de France il n'apparois-  
soit aucunes nuées de seditions n'y tumul-  
tes, il en estoit fort marry. Et incontinent  
afin d'exciter tumultes, & remettre sus  
l'autel de Discorde, il enuoyoit icy au se-  
cours des nouveaux suppostz & ministres  
de sa fureur & audace. Mais quand il oy-  
oit dire qu'il y auoit quelque meurtre fait  
en France, qu'il y auoit eu sedition ou bat-  
terie, telles nouuelles luy tomboient dans  
la poiētrine plus douces que miel (afin  
qu'il vse de la façon de parler d'Homere)  
car c'est chose qui luy est donnée de na-  
ture, qu'il repaist fort volontiers ses yeux  
de sang humain, comme vn autre Alpius:  
Tellement que quand il oyt dire que les  
Françoys se battent & s'entretuent en be-  
stes brutes, telle nouuelle le resioit, le  
doux pasteur & Euesque qu'il est. Par ces  
edicts qu'il a faict sus le faict de la guerre,  
il commande que tous Papistes soient ruez  
disant que s'il en reste aucun viuant, sa  
Cause ne peult estre assuree Il commande  
de



de qu'on coupe les parties honteuses aux  
 moynes & prestres, il dict qu'il en veult  
 emplire vn puy comme iadis Alachistyr-  
 ran des Lombards auoit entrepris de fai-  
 re si la mort ne l'eust preuenue. Et quant à  
 nous qui refusions de nous enrooller en  
 la Cause, & qui nous en estions separez, il  
 estime qu'on nous doit proscrire & banir  
 au loing. Si toutes ces choses aduiennent  
 comme desire ce malheureux Tyran (ce  
 que Dieu ne vueille) il faudra luy dire ce  
 que quelqu'un dit à Sylla, voyant qu'il ne  
 vouloit mettre fin à ses proscriptions. Avec  
 qui viurez vous en France? car ceux qui  
 demeureront de ceux de la Cause malay-  
 sement pourront peupler vne ou deux  
 villes. Mais son esprit auégulé ne voit rien  
 de tout cela, tant il est animé cōtre le Roy  
 & son Royaume, qu'il demande la solitu-  
 de & desolation de la France à quelque  
 pris que ce soit. Et si Dieu eust donné à ce  
 bon Euesque & Prophete ceste force ad-  
 mirable de parolle qui auoit force de glai-  
 ue, avec laquelle S. Pierre tua Ananias &  
 Sapphira: & S. Paul auégla Elima, bon  
 Dieu quelz massacres feroit il en France.  
 Ce furieux couperoit d'un coup la gorge



à toute la France: mais pource qu'il ne luy  
est permis d'vser de cruauté à force ouuer  
te enuers la France & enuers nous, il ne  
cesse point de machiner sa ruine en ca-  
chette. Et voyant que ses entremetteurs &  
messagers qu'il auoit departis par toute la  
France n'auoient pas assez aduancé à son  
gré la sedition & la Cause, apres les auoir  
bien tancez, en fin luy mesme y vint souz  
pretexte d'un Synode general qu'il auoit  
assemblé de diuers prescheurs de sa factiō  
non point pour traicter de la Religion,  
mais de la Cause. A laquelle assemblée,  
comme meschante & illegitime, dressée  
tant seulement pour nourrir & entretenir  
les seditions en France, resisterent tous  
ceux qui tenoient pour la religion pure,  
eulongnez de faction & sedition. mesmes  
Pierre Ramus apprestoit vn liure plain  
de doctrine & pieté contre sa faction &  
temerité, par lequel il enseignoit qu'il e-  
stoit venu en France en cachette, & com-  
me par vne gouttiere, pour nous donner  
par force le talmud de Sauoye, & nous se-  
mer des feux & seditiōs au lieu de la vraie  
& sainte Religion. Ce liure eust esté bien  
tost mis en lumiere par Ramus, s'il ne fust

mort en ces miseres. En l'assemblée la plus secrette de ce Synode, en laquelle il auoit receu les seulz de la Cause, & encor les plus fidelles, il ordonna nommément qu'on amassast de tous costez le plus que on pourroit de deniers comme estans les nerfs de la guerre. Et pour ce faire il aduifa que chacun vendroit ce qu'il auoit, & que l'argent seroit mis au plustost que on pourroit au tresor de Geneue, & à la bourse commune qui auoit esté nouuellement establie à ceste fin. Et quant au surplus de ce qui estoit necessaire pour amasser les gens de guerre estrangiers il en prenoit la charge sur soy. Incontinent que i'entendis qu'on dressoit vne bource commune, & que les nostres amassoient argent, ie monstray que cela se faisoit sans aucun exemple de noz maieurs.

Que les anciennes Eglises des Chrestiens n'auoient iamais eu bources communes, que pour les pauvres, que nous offrions liberallement pour les pauvres, & pour l'honneur de Dieu toute nostre substance, mais que noz bources n'estoient ouuertes à personne pour vouloir

133  
entreprendre la guerre contre le Prince,  
& le repos public. En la mesme assemblée  
ceste furie ordonna que par toute la Fran  
ce description fust faicte du nombre des  
hommes, & des facultez de ceux qui font  
profession de la religion. Tous les bons  
refuserent d'entrer en cedenombrement  
& description, pource que tel denombre  
ment est vne profession de subiection, la  
quelle n'est due à autre qu'au prince. Ce  
sont choses qui appartiennent aux Roys,  
& non aux autres. Et mesmes d'autât que  
elles contiennent en soy quelque renou  
uellement & memoire de seruitude, les  
Roys mesmes ne les doiuent pas faire à  
toutes heurtes, n'y legierement. Mesme  
Dauid fut affligé de Dieu (tesmoing Sa  
muel) de ce que sans cause il auoit faict  
censer & denombre son peuple. Quicon  
que estant priué vsurpe le denombrement  
des hommes, & la bource commune, il en  
treprend sur l'auctorité du Roy. Et dy que  
ie ne pouuois bonnement croire que le  
Roy qui est maieur peust endurer telle  
chose.

Dauantage que la Cause eust son Prin  
ce environné de troupes, son Chancelier,

ses Secretaires, ses Ambassadeurs, ses tresoriers, ses Capitaines, les legiōs pour munir des Eglises comme des Frontieres, que tout cela se fist aux despēs du peuple, que de grands gages & salaires leur fussent assignez sur le sang & sueur des subiectz du Roy, qui d'ailleurs à grand peine ont puiffance de payer les tailles & impositiōs ordinaires, le leur declarois que par telles façons de faire le peuple estoit oppressé, & le Roy offensé. Car à la verité cela n'estoit autre qu'establir vn nouveau Royaume en la barbe du Roy: Et preuoyois que telles choses estās faictes, mesme en la court du Roy, & en sa presence, elles ne pouuoient durer, n'y estre endurées long temps.

Les peres de famille n'endurent pas volontiers en leur affaires domestiques, que l'administration de leur bien soit vsurpée par vn autre: plus difficilement l'endurent les Roys en leurs Royaumes, & en leurs Courts, esquelles la pluspart du tēps ialousie & soupçon ont coustume de faire leur nid. En fin cest argent faux & venimeux de la Cause amassé de noz larmes & plainctes contre la volóté du Roy,



734  
& sans son mandement, estoit dissipé, & cōsume par ceux de la Cause en mauuais vsages. Car plusieurs personnes inutiles & indignes de viure à cause de leur meschanceté en estoient nourriz splendide-ment & magnifiquement. Surquoy ie vous veux dire vn exemple qui est assez congneu en Cour.

Vn pauvre homme du pays de Gascongne vint à moy pour vn procès tout mal en ordre, & deschiré, à qui ie prestay de l'argent pour viure au iour la iournée. Il aduint que par le moyen de l'ancienne frequentation qu'il auoit avec la femme d'un de la Cause, qu'il entretenoit, il fut par elle introduit en la Cause. En moins de rien il deuint tout autre que de coustume, tellement que ie le mesconnoissois. Je le trouuay habillé à l'aduantage, accompagné de plusieurs valetz, au reste despendant vne infinité d'argent en toutes superfluitez & voluptez. Je demande à quelques vns qui l'auoit en si peu de temps esleué en tel heur d'une si grande misere, ilz me respondent que c'est la Cause. Je leur demande encor pourquoy vn homme de neant & moin-



dre que tous hommes s'estoit rendu si agreable au Prince de la Cause, qu'il ne se eslongnoit iamais de luy, on me dict qu'il luy auoit promis son seruice en tel homicide qu'il luy plairoit. Ce qu'ayant sceu ie tançay par plusieurs fois ces courtisans de la Cause de ce qu'ilz n'auoient honte de nourrir aux despens publics des hommes de neant, couuerts de tous vices & meschancetez, & les charger de leur Ambassades & negotiations les plus graues & serieuses: A quoy ilz me respondoient à l'oreille que bien tost ilz feroient vn acte grand & memorable. Dont ie colligeois que la Cause auoit des larrons & des meurtriers cachez dedans son sein comme dans vne guayne, qui deuoient plustost estre redoubtez par les Princes, que par les personnes priuées.

Bref i'oyois dire qu'ilz assembloient de tous costez des hommes hardiz, courageux, entrepreneurs, & prompts à la main, pour faire quelque meschante & malheureuse acte. Et quand ie m'enquerois quel profit pouuoit porter ces monstres d'hommes à la dessusdicté Cause,

ilz ne me respondoient sinon, c'est pour  
faire vn beau coup. Ce pendant ilz vi-  
uoient, & estoient nourriz du nostre, de-  
uans estre à l'aduenir cause de nostre rui-  
ne, car pour mon regard, à grand peine ay  
ie peu eschapper les mains de ces meur-  
triers. Or n'ayans peu ceux de la Cause im-  
petrer du Roy qu'il declarast guerre ou-  
uerte au Roy d'Espaigne, ilz entreprin-  
drent de faire tuer en trahison par leurs  
meurtriers les deux personnes les plus pro-  
ches du Roy, l'une en ligne directe, l'autre  
en ligne collateralle, pensans que ceux là  
les auoient empeschez d'obtenir du Roy  
ce qu'ilz desiroient. Dont ayant este semé  
vn petit bruit par quelques vns, ayant en-  
tendu que les principaux de leur noblesse  
en vouloient tenir conseil secret, ie persua-  
day à plusieurs gentilzhommes de nostre  
pays qui m'estoiēt fort amys de ne se trou-  
uer point en ceste assemblée, & suyuant  
le conseil de Salomon qu'ilz ne se mesla-  
sent point avec les seditieux, d'autant que  
leur ruine est prochaine. Et ayans ceux là  
refusé de s'y trouuer, & m'ayans assez le-  
gierement nommé autheur de ce conseil  
non par malueillance qu'ilz me portassent,  
mais

mais sans y penser, ils me mirent en grād danger. Car ceux de la Cause en estans aduertis, d'autant aussi qu'ilz cognoissoiēt que ie leur nuysois fort en d'autres affaires qui appartenoiēt à l'establissement de leur Cause, baillerēt charge de me tuer à vn de ces volleurs qu'ils nourrissoient de nostre argent pour le detrimēt du public, & de tous gens de bien: lesquels le lendemain apres disner pensans me trouuer seul faisans des escriptures pour mes parties comme i'auois accoustumé, de fortune il me trouua entre vne & deux heures apres midy disnāt plus tard que de coustume avec mes domestiques & quelques vns de mes parties à cause de quelques empeschemēs que i'auois eu au matin. Parquoy il s'ē retourna sans rien faire & sans mettre en euidence sa fureur. Oltrachus ayant esté enuoyé par Mithridates pour faire tuer Lucullus souz ombre d'amitiē, il ne peut entre chez luy, pource que de fortune il dormoit ce iour là à mydy: dont Plutharque escript que le dormir du mydy le sauua. Ainsi le disner d'apres mydy me sauua. Car si i'eusse disné à l'heure accoustumée ceux de la Cause euf

470  
sent perdu en moy vn grand ennemy. Ce  
qu'ayant entendu par Paul de Tholozé  
qui m'aduertit en amy que si i'auois es-  
chappé du fer pour l'aduenir ie me gar-  
dasse du venin. Ayant delibéré de me  
plaindre en public de ces embusches, il  
me dist qu'en vne si grande licence de  
meurtriers, il m'estoit plus seur de me tai-  
re & me garder : Par telle contraincte, &  
menace ie fus contrainct de me departir  
de la plaincte que i'auois delibéré de fai-  
re. Pource que ceux de la Cause remplis-  
soient les brigands & voleurs de richesses,  
tous les meschans s'assembloient à l'en-  
tour d'eux, partie soubz esperance de bu-  
tin, si la guerre ciuile, qu'ilz esperoient se  
fust embrasée, partie aussi pour la friandi-  
se de l'argent contēt qui se trouuoit prest  
pour tous ceux qui promettoient faire  
meurtres en trahison, ou hardies entre-  
prinſes. Quelques vns des nostres attirez  
par ces raisons, ou autrement de leur in-  
clination mauuaise, d'autāt qu'ils voyoiēt  
que la pauureté estoit la compagne de la  
religion, eschappoient de nous, & s'adioi-  
gnoient à ces meschans sectateurs de la  
Cause. Mais nous portiōs assez patiēment



la perte de telles gens, & disions ce que iadis l'Eglise d'Angleterre auoit dit de Cadbalde Roy d'Angleterre, qui s'estoit rangé aux Idolles, pource qu'il ne pouuoit endurer les reprehensions que les Euesques luy faisoient pour ses fautes publiques, qu'il auoit nuy, non à l'Eglise, mais à soy mesmes. La Cause s'enfloit de iour en iour de meschans & malheureux hommes: mesmes plusieurs gens de bien par imprudence s'y laissoient tomber, pensans qu'il ne s'y traittoit d'autre chose que de la pleine liberté des Eglises, de laquelle les Ministres de la Cause faignoient auoir l'idée, & l'exhiboient au peuple comme chose populaire, & faisoient come Symonides, lequel louant les mules faisoit mention des cheuaux qui les auoient engendrées, & non des anesses: ainsi ceux cy proposoient en public la liberté de l'Euangile, de laquelle, come d'un bon commencement à esté engendré ceste maleureuse Cause, mais à l'entrée de leur Cause ils ne faisoient mention de la faction & conspiration qui à souillé & corrompu ceste liberté d'Euangile, & parce plusieurs hommes simples & rudes, ou bien les personnes peu resolues en leur entendement, quid en menoient diuerses choses en leur



esprit, estâts attirez par ce premier aspect  
 de ceste beauté, & par le specieux nom  
 de ceste liberté estoient prins & engluez  
 comme par des filetz. En ceste liberté  
 Chrestienne, dont nous faisons professi-  
 on vraiment & purement, & eulx fau-  
 cement & à fin de mal faire, il nous est ad-  
 uenu ce quiaduint à l'espouse dont parle  
 Plutharque en ses narrations amoureu-  
 ses, laquelle ainsi que son mary la menoit  
 en sa maison fut empoignée par son a-  
 moureux, & comme chacun deus la tiroit  
 à soy, elle fut miserablement desmem-  
 brée: Ainsi nous vrayz espoux tirions à  
 nous la liberté de l'Euangille pour en v-  
 ser, & ceux de la Cause la tiroient à soy  
 pour en abuser & deguïser leur meschan-  
 ceté, & en fin ceste liberté deschirée &  
 annichillée s'est perdue, & est maintenant  
 deuenue à neant en France, & est ce mal-  
 heur aduenu, non par nostre faute, mais  
 par la meschanceté de ceux de la Cause,  
 comme i'ay deliberé de vous monstrier  
 par la presente suyuant ce que ie vous ay  
 promis par le commencement d'icelle.  
 Donc à fin que vous nous deliurez de  
 tout soupçon de sedition, & que vous esti-

mez que nous sommes sans faute, sçachez  
 que toutes les contentions que nous au-  
 uons eu avec ceux de la Cause, qui ont  
 esté en grand nombre, diuerses, & aigres,  
 nous auons tousiours combatu pour la  
 pieté & tranquillité, & auons mis grande  
 peine à estaindre toutes les flammes de  
 sedition que la Cause allumoit de iour à  
 autre. Comme le vent de Mydy amasse  
 les nuées, ainsi la Cause des tumultes &  
 seditions: comme la Bise dissipe les nuées,  
 ainsi nous dissipions tant que nous pou-  
 uions leur meschantes entreprinſes, &  
 n'espargniõs rien pour y paruenir. Ils veil-  
 loiēt pour la guerre & pour la ruine du pu-  
 plic, & en cela nous auions vne tresaigne  
 & tresdure contention contre eux à fin  
 de dissuader & empescher la guerre, la-  
 quelle ils procuroient par tous moyens  
 à eux possibles. Nous leur proposions la  
 sagesse des Gentilz qui ont voulu que lon  
 entrepreigne les guerres lors tant seule-  
 ment qu'on nous trompe, qu'on nous cõ-  
 trainct, ou qu'on nous despouille: Mais  
 tant s'en faut que nous peussions pren-  
 dre les armes contre les Papistes loubz  
 ce pretexte, que si nous voulions venir à

compte (comme on dit communément) ils auroient plus grande occasion de nous faire la guerre pour ceste Cause. Les mesmes Philosophes ont estimé que la guerre, qui est chose presque brutalle, ne se doit iamais entreprendre sinon à fin d'auoir paix asseurée. Mais la Cause veut renouueller la guerre pour destruire vne paix & vn tresgrand repos public. L'antiquité à tresbien conseillé qu'il faut supporter toutes choses plustost que de venir aux guerres ciuilles, & ont fort loué ceux auquelz les armes ayants esté offertes ont mieux aymé aller en exil qu'estre cause d'espandre le sang ciuil. Et au contraire la Cause agitée de furies desire changer la grande tranquillité d'ot elle iouit, en meurtres & desolations, sans estre aucunement outragée ny prouoquée, & desire veoir la mort des François soit à tort ou à droit, se proposant sa volōté & cupidité seule pour cause de iuste guerre, combien que les Théologiens estiment que les guerres ne se doyuent entreprendre par volonté, mais par nécessité, & les remedes si aspres ne se doyuent vser sinon lors que la dure nécessité nous presse.

Mais rien ne pressoit la Cause, autre chose ne la trauailloit que le trop de repos, & afin que i'vse des parolles d'Eusebe, l'Eglise foisoit trop en paix. La Cause destituée de tout pretexte raisonnable de guerre, neantmoins preparoit la guerre contre le commandement de Dieu, & sans la permission du Magistrat: Et se doit appeller telle sorte de guerre par les loix nulitaires non guerre, mais brigandage. Les armes des personnes priuées sont execrables s'elles ne sont couuertes de l'autorité ou consentement du Magistrat. Tant que le Prince de Condé à vescu, son nom seruoit de couuerture à leur entreprinse, à l'exēple d'Abraham qui est excusé assez froidement de ce qu'estant personne priuée il arma les siens soubz pretexte qu'il auoit fait alliance avec Escol & Mābre princes de grāde autorité, & qu'il auoit armé ses soldats souz leur aueu. Mais le Prince de Condé estant mort, on ne peut alleguer pour autheurs de ceste malheureuse guerre, ces bons & innocens Princes qui luy ont suruescu, veu que ayans besoing d'estre autorisez par autruy à cause de leur bas aage,



ils ne peuuent donner autorité aux autres. Car par le benefice de leur aage le re-  
 lieurement leur est tousiours ouuert. Et le  
 Prince de Condé mesmes s'il viuoit ne vo<sup>u</sup>  
 autoriseroit iamais en l'etteprinse d'une  
 si meschante & volontaire guerre, desia il  
 auoit congneu l'imposture & meschance-  
 té de la Cause qu'on luy auoit couuerte  
 d'un voyle de religion. Et partant il com-  
 mençoit à hayr & detester ce bon mini-  
 stre de Satan inuenteur de la Cause : &  
 pour ceste raison quand on luy anonça la  
 mort du Prince de Condé, ie le vy saute-  
 lant de ioye, pource qu'il cognoissoit que  
 par la mort de ce Prince la principale  
 charge venoit à ceux qui fauotisoiet plus  
 qu'ilz ne deuoient leur meschantes facti-  
 ons & la Cause. Et aussi d'autant qu'il sca-  
 uoit que le Prince de Condé auoit gran-  
 dement detourné son esprit de la Cause  
 par le conseil de ce saint homme Pero-  
 celly de qui cestuy cy estoit ennemy mor-  
 tel, comme de tous les autres gens de biē.  
 Je pense que si le Prince de Condé eust  
 eu loysir il eust dit en mourant à son filz  
 & à son nepueur de ceux de la Cause ce  
 que Iustinian le ieune mourant dit à Ty-  
 bere



bere qu'il auoit designé pour Empereur  
 en luy monstrant les conseillers qui es-  
 toyēt presens, Ne leur croy point, ne leur  
 obey point, Car ils m'ont mis en la misere  
 ou tu me voys. Nous nous efforcions, ô  
 Portes d'arracher les armes des mains des  
 seditieux, avec plusieurs autres raisons, &  
 aucunes fois nous y profitiōs quelque peu,  
 & pour vn temps. Mais incontinent nous  
 oyions dire qu'ils auoient empoigné quel  
 que legiere occasion de s'esmouuoir. En  
 quelque lieu le Magistrat auoit donné sa  
 sentence contre l'Edict de la paix, & par-  
 tant il falloit destruire & le Roy, & les Pa-  
 pistes, & estoiet excitez à ce faire par leur  
 meschants Ministres, de telle façon que  
 biē souuēt on fut venu aux armes, si nous  
 ne fussions accouruz pour leur remon-  
 strer que plusieurs parolles faulces s'es-  
 pandoyent contre le Magistrat, & leur en-  
 seignions qu'il ne falloit pas temeraire-  
 ment jeter vn Roy innocent hors de son  
 trosne pour la faute d'vn Magistrat, & que  
 les anciens s'estoient souuent oubliez en  
 cest endroit. Car plusieurs afflictions es-  
 toient données anciennement aux Chre-  
 stiens par les lieutenans des Prouinces

& nommément par les gouuerneurs des Gaulles, comme tesmoignent les histoires contre la volonté des Princes mesmes Chrestiens, & en ceste façon plusieurs gens de bien estoient oppressez. Ainsi Sainct Marin noble Soldat eut la teste trenchée en Cesarée pour la religion Chrestienne contre la volonté de Galien Empereur soubz le regne duquel l'Eglise eut vne grande paix. Ainsi ont esté plusieurs indignitez perpetrées par les Magistrats contre Sainct Ambroise au desceu d'Arcadius.

Le disois qu'il falloit corriger les fautes des Magistratz, non par voye de fait, ny par sedition, mais par voye de iustice, & qu'il falloit demander iustice par iustice, mesmes à vn Prince qui y est fort enclin. Quand ceste sedition estoit appaisée, vne autre s'esleuoit sur le cháp. Ils faignoient q le Roy auoit fait qlque chose pour eneruer l'Edict de paix. Ils menaçoient le Roy de feu, de foudre, de la destruction de son Royaume, ilz couroient aux armes. Nous remonstrions qu'il en falloit parler au Roy au parauant que de venir aux armes, & monstrions que les Roys

quelques fois seruent à leurs peuples, & qu'ils font plusieurs choses par contrainte & malgré eux, & qu'en ce cas iamais homme de iugement & d'equité ne les blasma. Loys le piteux a esté appellé le protecteur de l'Eglise, & neantmoins il enuoya en exil nicephore Patriarche qu'il aymoît fort, & qui estoit congneu par sa grande probité & sainteté de vie, & ce pource qu'il ne plaisoit pas au peuple, auquel il ne pouuoit résister sans meurtre & dommage du public. Vne autre fois ilz disoient qu'en allant à leurs presches ilz estoient harassez par les mocqueries & brocards du populace Papiste, & de là ilz prenoient comme des torches pour allumer la sedition, & auoient tout à propos leurs Ministres qui les proquoient à fureur, preschans que toutes iniures mesmes les plus legieres se deuoient vanger par sang & cruauté, estants du tout esloignez de la douceur d'Eusebe Samotasoïs, lequel estant blessé à mort d'une tuille que luy auoit ietté vne femme Arrienne, il appaisa tous les siens qui le vouloient vanger, & mourant fit iurer à ses amis qu'ils ne demãderoient point punitiõ d'elle. Car ce saint hõme cognoissoit

430  
que quelques fois ceux qui pourfuyuent  
trop aigrement la vengeance d'une iniure,  
se sont mis en grands dangers, & ont  
prouoqué de grands massacres sur leur  
chef. Soubs Cumain gouuerneur de Iu-  
dée du temps de Claudius, pource qu'un  
soldat Romain retroussant honteusemēt  
ses habillemens, auoit tourné son derriere  
vers le temple des Iuifs, voulant les Iuifs  
s'en venger, ils esmeurent vne sedition  
contre les Romains qui leur succeda si  
mal que dix mille Iuifs y furent tuez. Et  
finablement ce qu'on s'efforça en vain  
de vanger ceste iniure legiere, fut cause  
d'une persecution generale sur toute la  
Iudée & Palestine. Les ministres de la Cau-  
se faisoient courir ce prouerbe, *Fais toy bre-  
bis le loup te mangera*, disans qu'ilz auoient esté  
massacrez par les Papistes, pource qu'à l'e-  
xemple des brebis, il menotent vne vie  
douce & payfible, mais que ce temps de-  
mandoit d'autres façons de viure, & d'au-  
tres mœurs. Qu'il falloit assaillir les Papi-  
stes, qu'il ne falloit laisser sans vengeance  
aucunes menaces, n'y iniures, qu'il falloit  
de iour en iour entreprendre quelque  
chose par dessus l'Edict, à fin que en vsur-



pant petit à petit, la liberté des Eglises, prist accroissement : Au contraire nous disions que c'estoit chose digne de la modestie Chrestienne, de nous contenir dans les bornes des loix & limites de l'Edict. Car comme quelqu'un des Theologiens disoit, la plus grande liberté Chrestienne qu'on scauroit auoir, est de seruir aux loix. Bref ie disois qu'en attendant contre, ou par dessus l'Edict, nous nous rendrions indignes d'iceluy, comme infracteurs des conuentions particulieres que nous auons faict avec le Roy, & aussi comme violateurs de ce contract general, par lequel Sainct Augustin dict que tous les hommes sont astraincts d'obeir aux Roys, ce que nous Chrestiens deuons faire plus que tous autres avec toute douceur, & sans gloire & audace, & comme dict saint Gregoire avec parfaicte humilité. Du temps de Valentinian l'Eglise d'Alexandrie s'estant rendue plus insolente que de coustume, & s'estant efforcée de passer plus outre que la liberté qui luy estoit permise fut si abaissée & affligée, que les Chrestiens furent contraincts sacrifier aux Idoles des payens, ce que Dieu par sa clemen

452  
ce ne vueille permettre de nostre temps.

La liberté Chrestienne à tousiours esté anciennement donnée soubz ceste condition, que les Chrestiens viuroient modestement & pacifiquement, sans rien entreprendre contre les loix, & la discipline publique. En cestermes ont esté conceuz les Edicts qui ont esté faicts de la liberté des Chrestiens, & des Iuifs par Auguste, Tybere, Caius, Traianus, Antonius, Pius, Maximinus, & autres Empeurs. Et mesmes les Chrestiens anciens sont louez par Pline, & Serenus aux Epistres qu'ilz escriuent à Traian & Adrian, de ce qu'ilz faisoient toutes choses conformément aux loix.

Mais quant ils commençoient à faire des seditions, despriser les Edicts, & commettre quelque chose cōtre les loix, alors les Edicts qui estoient faicts de la liberté Chrestienne leurs estoient oitez. Alors on ordonnoit contre eux des mortz, des tourments, des sacagements, des pillages, des escartellements, des brulements, lames ardentes, tortures, precipices, rotissemens sur des grilz ardents, & autres choses semblables. Et estans priuez de li-

berté, ils estoient mis soubz le ioug de seruitude qu'ils auoient mérité. Et d'autāt que par leur fureur ils auoient prouoqué sur eux telles calamitez, persōne n'auoit pitié d'eux, car comme quelqu'un des anciens a dict, ce n'est point effusion de sang que punir les seditieux. Sainct Ciprien parlant de la persécution qui fut souz Dece, qui auoit esté prouoquée par la rebellion & sedition des Chrestiens, parle à eux en ceste sorte. La persécution est venue de noz pechez: Vous suyuez l'orgueil, vous renonciez au monde de paroles & non de faict. Vous vaquiez à sedition & dissention: nous sommes donc batus comme nous le meritions.

Quant Sainct Ciprien dict ces parolles à ceux là, il parle aussi à vous qui estes adonnez à la Cause, qui en violant l'Edict & les loix, & conspirans contre le repos public, & le Roy auez precipité, & vous & nous en ces calamitez, que des long tēps vous desiriez auācer si nous n'eussions quelque peu retardé vostre fureur. Car estās le Roy de Nauarre & prince de Cōdé arriuez en Court, de ce lac qui no<sup>a</sup> a esté si funeste, & duquel iournellement les maux

754  
s'euaporent deuers nous, comme de la  
palu de Memphis, lettres nous sont apor-  
tées par lesquelles il estoit mandé à toutes  
les Eglises, que par l'aduenement de si  
grands Princes la Cause estoit venue en  
eage, & qu'il estoit temps que les Eglises  
haussassent leur courage, & qu'elles en-  
traissent aux villes avecques armes, & fis-  
sent leurs presches dedans les murailles  
d'celles contre l'Edict. Les lettres estans  
receues & diuulgüées, on commanda à vn  
chacun d'aller aux presches avec les ar-  
mes. Comme on s'apprestoit à l'exécutiō  
d'vne chose si dangereuse, nous y accou-  
rusmes pour diuertir vne si grande cala-  
mité, mesmemēt de l'Eglise de Paris, Nous  
prions les Ministres de considerer dans  
l'histoire de Sainct Ambroise, comme  
dans vn miroir le pernicleux euenement  
d'vn conseil si pestifere. Gaina grand Ca-  
pitaine soubz l'Empereur Arcadius, en-  
treprist vne mesme chose, & voulant in-  
troduire les Arriens, desquels il estoit, dās  
les murs de Cōstantinoble, dans laquelle  
il ne leur estoit loysible de faire assem-  
blées publiques, disant qu'il n'estoit pas  
conuenable que luy qui estoit grād capi-  
taine



taine & venoit nouuellemēt de si grandes expeditiōs de guerre allast prier dieu hors des murailles de la ville, par ceste façō de faire temeraire & insolēte il tōba en soupçō d'affecter la tyrānie & fut cause de grāds tumultes & contentions, tesmoing Sainct Ambroise . Et par ainsi afin d'euitier telz maux ie dissuaday, vne si dangereuse & temeraire execution , laquelle couurans & masquās par la venue de si grāds Princes, ils exciteroient enuie contre eux.

Ayants donc differé ceste entreprinse combien qu'ilz eussent delaissé la force ouuerte , ils ne se reposoient pas pour tant. Ils s'estudioient de semer des inimitiez entre le Roy & son frere le duc d'Aniou. Et pource que le son de peur est tousiours aux aureilles des seditieux, ils disoient que la trop grande amitié qui estoit entre ces deux freres estoit fort suspecte à leur Cause, & que de la discorde entre les deux freres prouindroit vne ttesgrande tranquillité & paix aux Eglises : que si cela n'aduenoit, il iroit mal pour elles .

Et neātmoīs il est escript par le Prophete que la paix des Princes est nostre paix & les

histoires ecclesiastiques tesmoignent, que  
 iamaïs les eglises ne furent si miserable-  
 ment affligées, que lors que les princes  
 freres menoient guerre & inimitié l'un  
 contre l'autre. Nicephore tesmoigne qu'en  
 Espagne du temps des Sarrazins les Eglises  
 endurerent grande calamité à cause  
 des guerres qui fut entre deux freres. En  
 France du temps de Charles le Chauue,  
 & Loys freres, pendant qu'ils font guerre  
 l'un contre l'autre, toutes les Eglises furent  
 destruites par la France & la Lorraine.  
 Mais ces hommes ennemis de repos, &  
 ayants en horreur la paix ne pouuoient  
 mettre cela en leur esprit, tant ils brusloient  
 de hayne contre le Roy, & le repos de la  
 France. Ils semoient des calumnies contre  
 le Roy & la Royne Mere & ceux du  
 conseil, ils accusoient publiquement leur  
 iniustice, afin d'aliener plus aisément du  
 Roy le cœur du peuple. Ils disoient que  
 le Roy n'osant rompre publiquement & a  
 descouvert l'Edict de paix, le faisoit en  
 cachette, & par lettres: & qu'il imitoit Ba-  
 siliscus meschant Empereur, lequel n'osait  
 oppugner publiquement le concile de  
 Calcedoyne, luy coupoit la gorge par des

lettres qu'il enuoyoit de tous costez à ses magistratz. Or n'y a il personne qui ne sache que cela est tresfaux en nostre Roy, & vous mesmes Portes, quāt vous vinstes en France, vous veistes que la paix & le repos estoient cōseruez en tous lieux par le Magistrat. Et en court vous nous trouuaistes iouissans de grand repos, & de grand honneur. Mais telles façons de mesdire du Roy, & de ceux de son cōseil, ce sōt vieux stratagemes de tous seditieux, qui veulent sembler amateurs du peuple, en blasmant l'iniustice & oppression des Roys & des gouuerneurs, & font semblant d'auoir pitié du peuple, pour exciter enuie cōtre les princes. Ainsi Cesar, ainsi Catilina, ainsi Absalon, ainsi tous hōmes seditieux & perdus, ont espandu les factiōs par le peuple. Les mesdisances de ces gens ne cessoiēt iamais, & estoient fort atroces cōtre le Roy, la Royne mere, & le sang royal. Et pource qu'en se telles gēs qui mesdisoiēt du Prince, c'estoit vn peché que de se taire, & de n'y cōsentir, & vn blaspheme que de vouloir deffendre le Roy, & moy & Vvabres nostre amy homme de douce conuērsation, fuyions l'assemblée & compagnie de telles gens, pour euitier à noyse: con-

gnoiffât mefmemēt que quelques vns de  
ceux de la caufe auoient eſté renduz ſuſ-  
pectz, & prefque banniz & decheuz de la  
Cauſe, parce qu'ilz ſembloïēt meſdire du  
Roy trop modeſtement. Et tant plus la pe-  
tulance des Miniſtres eſtoit grande, d'au-  
tant plus augmentoit la licence de vomir  
iniures cōtre le Roy, & ceux de ſon ſang.  
Or m'eſtant vn iour rencontré entre quel-  
ques Miniſtres qui meſdiſoiēt de telle fa-  
çon, ie leur recitay des parolles prinſes de  
l'Epiftre de Valentinian Empereur aux E-  
ueſques d'Asie & de Phrigie, ou il dit que  
par ces marques on cognoiſt & ſepare les  
Eueſques bons & fidelles des meſchans,  
pource que par les prieres des bons les  
guerres ſont appaiſées ſur la terre, ilz ne  
detractent point de la puiffance des Em-  
pereurs, ilz ſe rendēt ſubiectz à leurs loix.  
Si vous nourriſſiers des guerres & ſeditiōs  
& qui pēſez qu'il n'y a ſi cruelle meſdiſan-  
ce au monde dont il ne ſoit permis vſer  
contre le Roy, & qui eſtimez eſtre affran-  
chis des loix, & n'y eſtre aucunemēt obli-  
gez, ſi vous venez à la cenſure de Valenti-  
niā, vous trouuerez que vous eſtes vraye-  
ment ce que vous eſtes, Miniſtres non de



Dieu, mais de Sathan. Mais à ces gens furieux, & qui n'auoient pas leur esprit en leur puissance, ie m'adressois à eux non point avec des raisôs de pieté (par lesquelles ils ne se laissent gouverner) mais avec des peurs & craintes que ie leur proposois, & mettoys en auant disant. Ne sçauiez vous pas bien que les Roys ont plusieurs yeux & plusieurs oreilles? ne sçauiez vous pas bien que les anciens ont dict, ne maudissez point le Roy en vostre pensée, car les oyseaux du ciel luy portent vostre voix? Ne pësez vous point que le Roy quant il verra que vous abuserez si long temps de sa trop longue patience, à la fin il la conuertira en ire, laquelle à l'endroit des Roys est messagiere de la mort? N'auiez vous point leu que les Roys esmeus par les moqueries de leur peuple, encores que bien legieres, ont exercé de grandes cruauitez? Les histoires racontent que Maximinus assembla toute la ieunesse d'Alexandrie ensemble, & la fit tuer par ses gardes, pource qu'il auoit ouy dire à Rome qu'elle auoit ietté des brocards cōtre luy, & son pere, & qu'elle s'estoit moquée de ce qu'estant de petite stature, il

auoit voulu contrefaire le geste & l'alleure d'Alexandre. Anastase Empereur condamna Helie Euesque de Hierusalem, cōme crimineux de lese maiesté, pource que il auoit seulement ouy dire qu'il s'estoit mocqué de ses actions. Vousdōc qui vous adressez à la Maiesté, non seulement avec brocards & risées, mais qui foutez l'honneur & de luy & de sa race & famille, par des iniures atroces & piquantes, pensez vous qu'il les pourra digerer & endurer? Non fera croyez moy, & s'il le faict, il fera chose dommageable au public & à sa maiesté. Car cōme nous tesmoignent les Philosophes telle douceur enuers les hōmes meschans & dissoluz, est cruauté enuers les bons. Car l'humanité qui n'est point coniointe avec iustice, ce n'est point vne vertu digne d'un Prince, cōme disoit Archidamidas cōtre Charillus, qu'on louoit pource qu'il auoit esté doux & humain enuers vn chacun. En cesté façon ie leur annonçois l'indignation du Roy, & leur ruine future, afin de leur faire quelque peur. Mais en cela ie perdois mapeine, car apres auoir escouté tout ce que ie leur auois dit pour tout payement ilz me mettoient en

461 32  
auant, le iour que monsieur de Guyse fut  
blecé par Poltrot, duquel iour ilz fōt aussi  
grand estat quand ilz en parlent, que Bru-  
tus faisoit de ses Calendes de Mars, & Ci-  
ceron de ses Nones de Nouembre, & ad-  
ioustoient que tous les Poltrotz n'estoiēt  
pas morts en France. Quoy disant ilz me-  
naçoient tacitemēt le Roy de le faire mou-  
rir de mesme mort en trahison, & ce par  
des meurtriers asseurez qu'ilz nourrissoiēt  
& entretenoiēt à ceste fin dans les entrail-  
les de la Cause, par le moyē desquelz ayāt  
osté au Roy Mōsieur de Guyse qui estoit  
son bras droict, ilz se promettoiēt aussi de  
pouuoir faire tuer le Roy mesme. Inconti-  
nēt que i'euz ouy ces horribles & espou-  
uentables voix, ie commēçay à desespérer  
de la paix & tranquillité des Eglises, & dis  
lors ouuertement ce que iadis Caton dist  
quand il vouloit signifier que la ruine qui  
approchoit à cause de la sedition de Cati-  
lina estoit presente, la calamité est desia  
sur nostre teste. Iadis les Eglises ont esté  
priuées de leur liberté, & ont enduré per-  
secution pour des legiers soupçōs de con-  
iuration & sedition, d'autāt que les Roys  
estoiēt si ialoux de leur Royaumes, qu'ilz  
estoiēt espriz de craincte quasi Panique.

462  
De là vint ceste grande persecution & horrible cruauté d'Herode, pour vn soupçon faux qu'il auoit eu, qu'on luy vouloit oster son Royaume. Par vne semblable craincte vaine, Titus & Vaspasianus firent mourir cruellement tous ceux de la maison des Roys de Iudée. Ainfi & sans qu'il y eust autre coniecture, le nôbre des Chrestiens commença à estre suspect à Traian, & de ceste suspicion s'engendra vne tresgrande persecution sur les Eglises. Semblablement Licinius esmeu par vn legier & ridicule soupçon, pource qu'il pensoit que les Chrestiens prioient Dieu pour Constantin, & non pour luy, il les affligea cruellemēt. Si telles choses sont aduenues à ces innocens, & qui n'auoiēt iamais pensé non pas en songeāt, à faire sedition, que pensez vous qu'il aduiendra de nous, desquelz la cōspiration & faction est par maniere de dire enserree dans les yeux & dās les mains des Papistes ? Nous dis- ie qui manions les armes publiquement, qui faisons en cachette des ligues avec les estrangers, au detriment du Roy & de son Royaume, qui attachons le Roy d'iniures & d'execrations, qui le menaçons, & mesme luy



luy aprestons le feu , la ruine , & le sac de son royaume? le disois que ie ne craignois qu'une chose qu'il ne nous aduint pour la cause ce qu'il aduint iadis à Aspar & Arburius Capitaines de guerre du temps de Leon Empereur. Ceux là ayans dressé des embusches cõtre Leon pour le faire mourir, craignans que leur meschanceté ne fut descouuerte, excitoient leur complices de se haster par telles parolles, deuorons le Lyon au parauant qu'il ne nous face seruir sur table pour son disner. Ce qu'ayant sceu Leon il les fit meurtrir de grand matin par Zenon. Et par ainsi ayant preuenu leur embusche, & leur trahison, il les fit seruir non pour disner cõme ilz auoiẽt predict, mais pour son desieuner. Et pour ce qu'aux seditions & factions, Dieu a accoustumé d'estre le bouclier des Roys, ie presageois que ces factions, seditions & embusches de la Cause, retomberoiẽt sur le chef de ceux qui en estoient auteurs. Je sçay bien que tu as sceu de plusieurs personnes ce qui aduint à Paris la matinee de saint Barthelemy, mais on ne sçait quelle entreprinse auoient faict nouuellement ceux de la Cause, pour laquelle le

courage du Roy aye esté si griefuement  
offencé, & si soudainement allumé cōtre  
eux. Seulement sçay-ie bien que dans le  
corps de ceste malheureuse Cause, il y a-  
uoit tant de mauuaises humeurs de trahi-  
son & sedition, assemblées de si longue  
main, qu'il estoit impossible que la Cause  
estant si malade peust viure plus longue-  
ment. Mais ce qui est le plus à plaindre en  
ceste calamité, c'est que plusieurs des no-  
stres ont esté tuez avec ces meschans, s'en  
estant sauué fort peu. Ausquelz ie conseil-  
le qu'en cest exil & persécution ilz imitēt  
les anciens Chrestiens, qui estans en l'ex-  
tremité ou nous sommes (comme racon-  
te Epiphanius & Iustin en l'apologie) fui-  
oyent le combat, se soustenoient de prie-  
res & cogitatiōs saintes, ne se vengeoiēt  
point par factiōs & seditiōs, mais re-  
couuroient la paix de l'Eglise perdue, non  
par armes, mais par prieres. Mais ces mi-  
serables reliques qui sont demeurez de la  
Cause ruinée & rompue, ne veulent pas  
imiter cela, ilz ne se peuuent submettre  
d'aller au Roy à genoux, & luy dire ce  
que l'Eglise de Constantinoble dict avec  
saint Ambroise à l'Empereur; pour ap-

païser sa collere, O Auguste nous venons pour prier, & non pour combattre. Mais au contraire à l'exemple d'un serpent que on a couppé en pieces, ilz taschent de rassembler & esmouvoir à sedition leur troncques manques & inutiles, & s'efforcent de remettre sus encore un coup leur meschante & malheureuse Cause, sous pre-texte de religion laquelle ilz n'ont en fa-çon du monde, & sous couleur d'une li-berté chrestienne laquelle ilz ont mieux aymé perdre lors qu'ilz l'auoient, que de quicter un seul poinct de leur Cause & fa-ction.

Ces entreprinſes de guerre qu'ilz font, ne tendēt à autre chose qu'à aigrir de plus en plus le Roy qui est offencé cōtre nous, & à le contraindre de conuertir son yre en hayne perpetuelle, ce que nous deuōs engarder par tous moyēs que nous pourrons qu'il ne nous aduienne. Egesippe raconte que iadis quelques nepueuz de Iudas allerent trouuer Domitian qui estoit fort courroucé & aigry contre les Chrestiens, & luy firent entendre que le Royaume de Christ n'est point mondain

n'y terrestre, mais celeste & angelic, que eux en estants sectateurs ilz ne manioient point les armes, les glaiues, les guerres, ny les conspirations, mais seulement les prieres & oraisons, & menoient vne vie paisible: ce qu'ayant Domitian entendu il perdit tout soupçon, & commença à auoir bon estime des Chrestiens, & deuint plus doux enuers eux. Aussi estimay-ie qu'il se fault presenter au Roy à genoux, & d'un cœur abaissé, & sans retenir en soy aucune pensèe n'y cogitations d'armes ou vengeance, & par ce moyen i'espere que nous ierons remis par le Roy en la liberté Chrestienne, de laquelle la Cause nous a deiectez; tant ce bon Prince est doux & clement. Par ce moyen nous lisons que les Empereurs ont esté adouciz par les anciens peres qui ont remis sus leur liberté perdue, non par armes, nō à force de bras, mais par prieres & oraisons.

Quadratus & Aristides ont amolli par leur oraisons, liures, & Apologies le cœur d'Adrian enflâbé contre les Chrestiens, & ont obtenu de luy vn Edit en faueur d'eux. Ainsi Iustin en son Apologie à Antoninus



Pius proufita tant, que l'Empereur com-  
 manda que les Chrestiens ne fussent plus  
 molestez. Appollinaris Hieropolitain en  
 impetra autant de Verus par son Appol-  
 logie pour les Chrestiens de son temps.  
 Themistius appaisa Valentin par vn liure  
 qu'il luy dedia, & gaigna tant que la pey-  
 ne de mort dont les Chrestiens estoient  
 condemnez fut changée en exil. Qu'on  
 compare nostre temps avec ceux là, noz  
 guerres, noz armes, sieges, ruines, depopu-  
 lations, & factions contre les Princes, de-  
 puis que nous auons voulu ouurir le che-  
 min à Iesus Christ par armes, nous n'auõs  
 rien proufité, au contraire nous auõs tout  
 remply de sang, de cruauté, de tristesse, &  
 de misere. Et ces peres anciens ont obte-  
 nu ce qu'ils vouloient par prieres, oraisõs  
 modestie, & patience, par leurs escrits, &  
 Appologies. Mais vostre bon pasteur, qui  
 porte l'atheisme engraué au cœur, & Iesus  
 Christ au front, ne pense point qu'il faille  
 imiter ces saints personnages anciens.  
 Il recueille des pieces de l'ancien naufra-  
 ge de la Cause, pour composer quelque  
 nouvelle sedition. Il blasme fort ceux qui  
 restent de ceux de la Cause, de ce qu'ils

n'ont tué les princes de France, lesquelz il leur auoit marqué par plusieurs fois. Ce pendant il les exorte de prédre courage, leur promet l'ayde des Allemans, des Angloys, & des Souyffes. Car ces meschans suppots de la Cause, soubz ombre de la religion qu'ils mettent en auât, n'ot point de honte de soliciter les Allemãs & Souyffes, qui ne sont encore aduertis de leur meschanceté & trahison. Il s'efforce de les esmouuoir par lettres & ambassades, & son but est de nous ruiner encor d'auantage que nous ne sommes. Vous direz de ma part à ce boute-feu & furie infernalle, qu'il se repose & que s'il ne le veult faire, qu'il aduiendra en bref par la permission de Dieu, que les Princes & Republiques qui tiennent nostre religion apres auoir decouuert la trahison de la Cause, & la conspiration de ceux qui en sont, lesquelz sous l'espece de religion & liberté Chrestienne s'efforcent de renuerser & subuertir les Estats & Republiques, se mettrôt en armes pour les opprimer, assiegeront vostre ville. A B E L. receptacle de tous seditieux, & boutique de toute faction & conspiratió, duquel siege elle ne fera point deliurée,

iufques à ce qu'ils ayent ietté du haut en bas des murailles la teſte de SEBE prince des ſeditieux qui s'eſtoit rebellé du Roy Dauid, & auoit detourné le peuple de ſon obeiffance, lequel Sebe ſi vous regardez au lettres de ſon nom, & à la verité du faiſt, vous trouuerez que c'eſt la figure de voſtre paſteur, qui Dieu aydant receura vn pareil fruiſt de ces trahiſons & conſpirations que le meſme Sebe, & avec vne fin digne de ſa vie & mœurs. Et à la fin apres que le chef de la Cauſe aura eſté couppé, nous rendròs la louange à Dieu, & par tel le expiation, ayants appaiſé ſon ire, & celle du Roy, nous remettrons ſus noz Eglifes, pures & nettes de toute contagion de la Cauſe. Et vous ſemblablemēt Portes mō ſingulier amy, ornement de la Grece, laiſſant ceſt auare & cruelle terre, vous en reuiendrez à voſtre maiſtreſſe madame la duchefſe de Ferrare, qui à touſiours veſcu comme nous en la pure religion, deteſtāt la Cauſe. Et alors tous enſemble eſtāts releuez de tant de miſeres, & purgez de ces mauuaiſes humeurs de la Cauſe, ferons cōfeſſiō publique de noſtre foy, telle qu'on diſt que fit Conſtantin, quant il fut inter-


rogué de la foy par Acholius Euesque: qu'il embrassoit la foy que l'Eglise obseruoit en Illirie auant qu'elle fut infectée de la doctrine d'Arrius: ainsi avec grand asseurance & allegresse, nous embrasserons ceste foy, que les Eglises de France auoient auant qu'estre souillées de ceste peste & cōtagion de la Cause, ce qu'il plaist à dieu nous octroyer par son filz Iesus Christ, lequel ie prie qu'il vous maintienne sain & sauf avec toute vostre famille, & qu'il garde vous & tous les bons du mal de la Cause. A dieu & nous ayez comme vous auez de coustume. De Strasbourg le 15. iour de Septembre.


F I N.


Fautes notables en l'Impression.


Feuillet 5. page 1. Cima Lizés Cimna. f. 6. p. 2 de l'Empereur de Constantinoble lizés du peuple de Constantino- ble f. 11. p. 2. nous le pouuons lizés nous la pouuons. f. 2. p. 1. Typhon lizes Triphon en la fin de la mesme page dōt ilz ont lizés dont estantz. f. 14. p. 1. tant aduané lizés à tant aduancé. f. 20. pa. 1. meschante & malheureuse lizés meschant & malheureux. f. 21. pa. 1. il ne peut entre lizés il ne peut entrer. f. 24. page. 1. nulitaires lizés militaires.















THE  
NEWBERRY  
LIBRARY

